

欽定剿平粵匪方略

欽定勦平粵匪方略卷六十一 癸丑年

九月二十一日 癸亥 張亮基崇綸奏言逆賊於八

月三十日辰刻乘風直撲田鎮防所陸路賊匪
由彭塘分撲岸上營盤道員徐豐玉張汝瀛總
兵楊昌泗督飭水陸兵勇分投抗拒賊船沿岸
行駛譟呼索戰我水陸各營兵勇嚴陣以待賊
船駛近礮丸密如雨下我兵恃有牆柵遮蔽毫

無懼怯度我礮子可及從容施放擊沈賊船四隻賊匪落水無數其岸上撲營之賊距營百餘丈我兵越濠開槍轟斃賊匪十名賊勢不支卽行退走我陸路兵勇乘勝壓下賊匪紛紛敗退本月初一日黎明遙見賊船無數上駛開礮猛撲該道鎮等嚴飭岸上各營準備並添兵接應旋據探報賊分三路每路約千餘人上岸繞撲

田鎮我兵亦分三路迎擊遊擊董玉龍身先士卒衝入賊隊斃賊數十名總兵楊昌泗親督兵勇前後夾擊遊擊許連城率兵越濠直前轟擊都司曠輔廷參將駱永忠亦各帶兵勇分途痛勦立將執旗賊目刺斃賊始敗退各路乘勝掩殺該道等復調戰船兵勇順風下擊直逼賊船焚燬大船二隻約斃賊七八十人其由馮家山

渡江賊船並有執旗賊目所坐大船亦被礮擊
壞餘船一併乘風退去初二日賊船仍收泊距
田鎮十五里之富池口意在從南路襲攻半面
山後登峯遙窺知我陸營水寨布置嚴密旋即
退去計連次斃賊精銳三百餘名擊沈溺斃無
算斬獲首級十餘顆該逆兇鋒大挫揚言俟東
北風緊卽直闖田鎮初三日辰刻該逆從富池

口分船數百由湖路直抵興國州臣等前遣都
司任大華等帶兵防勦尙未趕到該州爲江西
入楚間道湖汊歧出水路可達通山距大江岸
六十餘里賊船由湖汊上犯山僻地方一爲搶
掠米糧一欲使我分兵策應得以乘虛衝突田
鎮臣張亮基前以田鎮兵力不厚祇可就近策
應不得分兵遠出致中奸計現在臬司江忠源

飭調已革副將張金甲雲南都司戴文蘭守備
馬良勳所帶兵勇二千名由瑞昌興國一帶已
至田鎮該臬司亦水陸並進星夜親督兵勇前
來會剿臣等又札委知府伍煒帶勇五百名都
司周祿帶勇三百餘名會同都司任大華之兵
相機夾擊此時田鎮兵力漸厚北岸蘄州廣濟
一帶有著臬司唐樹義督帶精壯兵勇扼險以

待田鎮可無後顧之憂南岸興國州一帶有該
臬司重兵前來聲勢更壯臣等又調已革同知
勞光泰帶省中新造礮船十餘隻前赴田鎮協
勦全楚門戶似可無虞奏入

上命軍機大臣傳諭張亮基崇綸曰逆船竄撲田鎮官
兵三次接仗斃賊甚多防勦尙屬認真所有南北岸
分擾餘匪著卽責成唐樹義及徐豐玉張汝瀛等督

率各文武員弁帶領兵勇無分水陸扼要堵剿以期殲除淨盡該司道等均能深悉賊情相機堵剿當可得力江忠源已有旨補授安徽巡撫逆匪窺伺廬州若不及早扼截必致紛紛北竄江忠源行抵何處卽著張亮基等飛催速帶兵勇馳赴皖省勦辦賊匪都司戴文蘭等所帶兵勇二千名現已行至田鎮並著飭令先行兼程赴皖湖北省新造礮船務須駛赴下

游以助江面攻剿

同日崇恩奏言據館陶邱縣及臣委弁先後拏獲由賊營逃回之張生等據供賊目林姓李姓姬姓三人並稱賊皆習教其由山西竄至直隸意欲在天津衛紮營等供臣素知天津一帶習教者甚多逆匪既有欲赴天津之說難保不勾結內應該處水陸交匯一被闖入深恐賊勢愈

張仰乞

飭下直隸督臣嚴飭該地方文武各員認真防截以杜
竄擾奏入

上命軍機大臣傳諭文謙特克慎張起鵠曰逆匪困踞
深州難保不急圖旁竄文謙等總須嚴密設防不可
稍形鬆懈盤詰奸宄尤爲緊要仍當隨時偵探賊蹤
務得確信與慶祺知照聯絡互爲聲援至崇恩所稱

天津一帶習教之人頗多若此時驟行查究恐人心
驚擾轉致別滋事端該鹽政等總宜密加防範不可
稍涉張皇

二十二日甲子僧格林沁奏言查逆匪現在困踞

深州正可乘機一鼓蕩平臣已札飭護軍統領
多爾濟那木凱帶領所統察哈爾馬隊官兵一
千名並所統京營官兵二百五十名副都統達

洪阿帶領所統京營官兵二千名共計官兵三千二百五十名立即拔營星夜馳赴深州聽候勝保調遣該護軍統領等遵於即日起行臣恐深州之逆潰圍北犯是以仍在涿州扼守以昭慎重

同日勝保奏言臣自十四日行抵深州該逆退踞城中連日伏匿不出臣因傳令先行進兵適

綿洵桂齡蘊秀帶兵趕到因令西凌阿善祿攻其西北西南兩路綿洵桂齡攻其東南臣親督馬步各隊由東北面進攻該州城外樹密林深環遮雉堞臣行至距北門城二里許令步隊進前先將擡槍擡礮擺布停妥再令練勇分作兩翼聽候入林搜捕又令馬隊排列左右遙爲聲援至佟鑑運解銅礮八尊卽飭帶領京兵橫置

後面相機接應該逆聞知大兵進攻遙擁出城
抗拒我兵誘俟偪近槍礮齊施該逆抵敵不住
倒走入林練勇隨分兩翼跟追抄殺突有騎馬
賊數百人俱用刀矛弩箭結隊衝來練勇退出
林外勢漸不支經臣先派馬隊伏於林邊賊方
擁至趕上救援奮力驅殺該逆紛紛潰竄復調
固原步隊上前用槍礮夾擊該逆擠入濠內踐

踏死者不計其數我兵追至北門釣橋該逆連
放大礮勢不能進且天色已晚兵勇鏖戰數時
之久斬獲甚多傳令撤隊兵勇分走兩旁中留
礮路以誘其追襲逆衆果盡數來追約數千人
臣飭佟鑑用銅礮連環轟放衆兵亦槍礮回擊
該逆死傷枕藉情知中計亡命奔逃入城我兵
亦撤隊回營統計殲斃逆匪七八百名奪獲旗

轍馬匹器械無算惟臣官兵扼其北竄安平東北竄饒陽之路而東面及東南面全賴綿洵桂齡巴揚阿堵勦乃二十日夜全股由東南逃逸當飭馬隊趕緊追截但恐逆匪舍命逃奔馬隊未能卽時撓住商令西凌阿等帶領各營馬隊跟蹤迅追查慶祺帶兵已至河間當飛咨迅速截勦復派副都統魁福先行帶領馬隊由饒陽

徑赴河間抄截臣亦卽日督帶馬步各隊分由
饒陽武強兩路齊進當此逆賊窮竄之時如果
皆能得力前後夾擊較之負嵎抗拒更易剷除
至東南景州劉智廟一帶已飛飭副將邱聯恩
帶兵一千名嚴加防堵杜其南竄一面飛調各
路未到之兵迅速由武邑阜城富莊驛獻縣一
帶兜截南竄之路至蘊秀所帶之兵一時乏人

管帶臣不敢拘執暫行飭令管帶迅速追剿均
奏入

上命軍機大臣傳諭僧格林沁曰據勝保奏督剿深州
賊匪大獲勝仗該逆已於二十日夜竄往東南全股
逃逸著僧格林沁卽飭多爾濟那木凱達洪阿將所
帶官兵內先行分派馬隊迅卽直赴趙北口任邱一
帶截擊以遏賊北竄之路其天津以北務關路等處

亦著酌派弁兵一律嚴行堵截恆春現飭尙阿太和
昌帶兵一千名馳往易州聽候德春調遣所有培成
帶領兵一千二百五十名卽可飭令撤回以備調撥
當此逆賊窮竄之時果能四面攻圍前後夾擊當不
難一鼓殲擒該大臣務飭統兵各員與勝保等合力
勦辦萬不可再令他竄

上又命軍機大臣傳諭勝保西凌阿善祿曰逆匪被攻

緊急連夜向東南竄逸雖據該大臣聲稱較之負嵎
抗拒更易剿除第兜裏稍不得力或致該逆上竄天
津下竄德州勢必餘燼復熾且此次騎馬之賊尙有
數百人並有大礮似尙非十分窮蹙慶祺所帶之兵
未可深恃卽所稱由景州一帶截其南竄之兵亦未
必竟能得力僧格林沁已遵派多爾濟那木凱等馬
步各兵起程諭令徑赴趙北口任邱等處迎頭截剿

諒可與該大臣前後夾擊深州城內是否尙有餘匪
該處文武作何下落各路未到之兵係何員管帶因
何尙未催齊著分別查明具奏該大臣營中將士前
在懷慶屢次打仗出力嗣復追賊赴晉亦能不避艱
險迅速繞出賊前奮勇截勦將弁兵丁日久勤勞朕
心時深軫念著勝保將懷慶出力人員擇其立功尤
著者先行保奏其餘各將弁兵丁並著存記如能迅

將此股賊匪悉數殄滅該大臣等卽將疊次勞績一併詳細保奏朕必加等獎勵此旨著宣示軍營使大小官兵愈知奮勉至直隸地方團練有效者如饒陽等處挑選壯練隨營助勦似亦可資得力並著體察情形酌量賞戴頂翎以遂其報國之忱

同日琦善陳金綬雷以誠慧成福濟奏言臣雷以誠會同侍講學士晉康江蘇臬司查文經連

日督飭將備出隊攻城本月初四日賊匪百餘人出缺口門至河邊搭橋安礮經兵勇轟斃賊匪二十餘名賊又縋城而下經守備趙鵬等開放槍礮各斃賊匪數名餘匪遁回上城初十日賊匪大股甫出南門尙未過河總兵瞿騰龍等督飭南路官兵邀擊賊知有備遂循埽垢山下環城而北約有一千數百餘名將進西門參將

鞠殿華等率兵攻擊署遊擊海明自後策應臣

陳金綬督率官兵向前截殺臣琦善亦親督將

弁爲後路聲援約共斃賊五六百名生擒紅衣

賊匪一名餘匪仍循山遁回南門城內至瓜州

之賊前經官兵三次擊退仍在沿江嘯聚時出

窺伺本月十二日偵得賊船六十餘隻陸續駛

至瓜州停泊臣琦善密飭南路各營嚴爲之備

十三日巳刻賊匪乘船由運河西岸前來三汊河迤南高明寺地方上岸三百餘人開放槍礮遊擊毛三元勒兵束伍與賊隔河相持驍騰龍率步兵設伏於刁家廟薩炳阿率馬隊設伏於卞家樓德興阿率馬隊設伏於王家巷皆偃旗息鼓以待詎意賊匪恇怯不敢深入漸次潛退經毛三元先派伏兵由浮橋渡河尾追施放槍

礮擊斃領隊賊目一名執旗賊三名匪黨六七
十名餘賊敗竄南奔瓜州臣等伏查粵匪占踞
揚城因官兵防剿益嚴已成坐困之勢惟城垣
高峻不得不高築礮臺臨城攻擊使之無以自
存揚郡地形平衍偶有坡陀起伏之處可以因
高爲之北面尤爲平曠興工較難臣琦善已派
河南城守尉哲克東阿知府李樹穀趕緊興築

以便併力環攻一面仍飭各營官兵更番出隊
分路埋伏俾資堵截奏入

上命軍機大臣傳諭琦善陳金綬雷以誠慧成福濟曰
據奏會攻揚城疊獲勝仗並擊退瓜州賊船各情形
均不過小有斬擒並未力圖攻克該大臣等頓兵日
久每逾旬日一奏塞責似此老師糜餉罪將安屬現
在賊踞安慶窺伺廬州安徽省爲河南山東門戶關

繫北省最爲緊要該大臣豈得諉爲不知且江北諸軍統歸節制設賊蹤復由皖北竄該大臣又豈得置身事外琦善等祇顧一隅朕不能不通籌全局慧成旣留揚城總兵瞿騰龍本係遵旨帶兵赴豫剿賊之員著琦善等迅卽飭令該員並原帶官兵二千名星速起程由閒道赴皖協剿不得率請留揚致誤事機琦善陳金綬雷以誠慧成福濟又奏言本月初

六日防守浦口之副都統開隆阿於剿匪回營
後因遇大雨感受風寒旋即出缺臣查開隆阿
久歷戎行素稱勇敢自派防浦口以來疊次帶
兵與總兵武慶等會剿賊匪打仗獲勝茲因積
勞成疾在軍營出缺其所帶吉林三四起官兵
卽令伊興阿會同西昌阿管帶奏入

上諭內閣曰正藍旗漢軍副都統開隆阿防守江南浦

口地方疊次會剿逆匪打仗獲勝茲聞溢逝軫惜殊深著照副都統陣亡例賜卹其家屬搬柩回旗時並著由軍營賞給銀五百兩任內一切處分悉予開復應得卹典該衙門察例具奏

琦善陳金綬雷以誠福濟又奏言查揚城自進兵以來雖有斬擒未能克復實由兵力不敷此次慧成抵揚適值會攻緊急添兵助剿更形周

密查慧成所統之兵除青州馬隊業已赴皖外
僅存兵九百餘名調赴安徽無甚裨益且千里
救援亦恐緩不濟急莫若留慧成帶兵在揚協
剿似較得力奏入得

旨允行

同日安徽巡撫江忠源奏言探聞九江失守賊
船多已上竄臣恐湖北警急飛催張金甲等帶

領兵勇趕赴田家鎮八月二十九日臣與總兵
音德布等帶領滇川各兵暨鎮守勇共一千九
百名由陸路馳赴九江以圖克復行抵馬回嶺
探悉賊船攻撲田家鎮當留戴文蘭李輔朝管
帶楚勇千餘名駐紮九江城外臣與音德布趕
赴田家鎮救援行至瑞昌又聞賊匪竄擾興國
臣卽繞赴興國賊匪聞臣兵至由富池竄出江

口當派知州朱孫詒帶兵赴興國州城安撫難
民飛調留駐九江之楚勇暨湖南鎮筸各營兵
赴田家鎮另調貴州兵赴九江駐紮臣等於九
月十二日午後行抵田家鎮察看情形北岸紮
有木筏排列礮船陸路亦紮營防護南岸一帶
地名半壁山懸巖壁立江流湍急因兵力單薄
未能紮營賊由池口繞上半壁山沿至徐家山

下紮營數座與我兵夾江相持臣當與徐豐玉等商議欲於南岸上游沙村一帶地方添紮營盤另用木筏攔截並將北岸營盤移紮扼要之處忽東南風大作賊船千餘隻傍山揚帆直上臣所帶兵勇未能全數渡江隨行僅數百名一切未能部署當與徐豐玉張汝瀛督率兵勇盡力堵禦賊船已駛至徐家山下傍賊營停泊臣

竟夜在木筏上督率兵勇極力轟擊十三日黎明風勢愈勁賊船仍由南岸揚帆上竄陸路一帶賊衆亦蟻擁而至環撲我兵營盤經徐豐玉張汝瀛督率兵勇抵拒鏖戰多時同時陣亡官兵遂至大潰臣水陸兼顧來往督戰親隨楚勇二十餘人血戰陣亡僅存數人勢已萬不可支急收集餘衆馳詣廣濟地方時署臬司臣唐樹

義帶兵駐紮廣濟急謀會兵赴省救護臣所帶
楚勇尙在江南岸興國一帶江面二十餘里皆
賊船分布無從飛渡臣卽日與唐樹義督帶駐
防江北之兵並收集潰敗餘兵會同音德布克
期由間道馳赴武昌省垣一面飛檄未到之兵
勇由江南岸徑赴省城此次田家鎮失守臣救
援不及咎實難辭仰懇

天恩將臣交部嚴加議處奏入

上命軍機大臣傳諭張亮基崇綸江忠源曰該逆自九江竄擾興國徑撲田鎮勢甚猖獗張亮基崇綸昨奏該處兵力不厚札委同知伍煜都司周祿帶勇前往會剿且有總兵楊昌泗兵勇分路迎擊何以此次接仗僅有該道等奮死抗拒鏖戰多時江忠源親隨楚勇亦皆血戰陣亡所存無多未見大兵隨後援應現

在南岸興國一帶江面二十餘里悉經賊船分布難保不由陸路窺伺省垣該署督等所派勞光泰帶去之新造礮船十餘隻能否不致疏失其餘續造船隻收集何處均須豫爲準備江忠源現與唐樹義會同音德布馳赴武昌惟安徽安慶被賊占踞廬州又在危急該處近接潁亳切須防賊北竄專待江忠源前赴皖撫新任該撫所帶兵勇仍酌量繞道帶往安徽

以資勦辦張亮基現未交部且熟悉楚省軍情卽與
崇綸督同唐樹義嚴飭地方文武員弁趕緊設法堵
截逆船溯流而上如道士袱蘄州等處均可扼守萬
不可令其肆意衝突其南岸陸路有無兵勇堵守亦
著迅速布置此時賊船聚集何處並著迅速查奏

上諭內閣曰逆賊自九江上竄擾及湖北興國徑撲田
鎮江忠源趕至該處與糧道徐豐玉漢黃德道張汝

瀛商同勦辦適因東南風大作賊船揚帆直上徐豐
玉等盡力堵禦擊沈賊船數隻江忠源亦竟夜督率
兵勇往來轟擊適因陸路賊衆環撲營盤我兵四面
迎擊水陸兼禦以致徐豐玉張汝瀛慶戰陣亡此次
官軍失利該督撫咎實難辭張亮基崇綸均著革職
留任江忠源初到援救不及自請嚴議著降四級留
任仍著張亮基崇綸迅將江面賊船督兵截勦毋令

更滋延蔓湖北糧道徐豐玉漢黃德道張汝瀛臨陣
擊賊奮勇捐軀深堪憫惻著交部議卹

同日文謙特克慎張起鵠奏言津郡本年秋雨
過多附近州縣四面皆水到處可通舟楫臣等
督飭文武員弁認真稽查於一切來往船隻加
意盤詰一面多派幹勇分路偵探若賊有東來
消息無論民船官舨概行封禁如遇飢民到境

卽咨遣回籍以杜溷跡並由 臣特克慎 臣張起
鵠飛飭河閒文武添募鄉勇慎密巡防 臣等仍
於豫籌防範之中示以鎮靜使居民不致驚惶
至賊匪如果東竄必由水路順流而下 臣文謙
臣張起鵠帶領兵勇輪流駐守西沽該處爲大
清河子牙河匯總之地舊有礮臺一座年久失
修現已另築土礮臺一座上安大礮賊來迎頭

轟擊似可得力臣特克慎署運司錢忻和帶領
兵勇在郡城西南擬要設礮輪替駐守以遏衛
河來路前議添雇壯勇四千名刻下將次招齊
更令城關鋪戶居民按戶各出一丁協同兵勇
晝夜巡防臣等逐日操演聲勢聯絡可期有備
無患奏入

上命軍機大臣傳諭文謙特克慎張起鵬曰據奏查緝

奸匪封禁船隻遣散難民辦理尙屬妥協不致張皇
該逆詭謀百出必須先事豫防著該鹽政會同鎮道
加意嚴防其界連河閒各要隘及支河港汊務須飭
屬不分晝夜嚴密防守毋稍疏懈如探知賊蹤有東
竄消息卽照所議扼要堵禦仍一面迅速具奏

二十三日 乙丑 巡防王大臣奏言查深州賊匪竄

出經勝保奮力擊敗趁此軍威大振不難殄滅

淨盡惟聞江西賊匪擾及廣濟等境儻此股賊
匪再行偷渡擾及豫東地方情形更爲喫緊深
州餘賊勝保乘勢追擊自不應驟易生手而江
西賊勢又必須實在得力之人帶兵迎擊方爲
可靠臣等再四熟籌東三盟兵卽日全抵京師
此項兵內哲里木盟一千名前曾奏撥參贊大
營現在培成帶赴紫荊關兵一千餘名可回參

贊大營毋庸再撥如將此項官兵三千名交德勒克色楞統帶前赴深州與勝保商同追擊並令勝保自行妥籌將西凌阿善祿酌留一人分帶乘勝之兵若干與德勒克色楞合兵進擊如已足資剿辦其江西之賊即可令勝保自領精兵迎擊不至使賊北竄卽江忠源等兵亦可與勝保前後合力攻剿應請

飭下勝保等迅卽相機辦理庶於軍務有裨奏入

上命軍機大臣傳諭勝保曰深州逆匪全股由東南逃竄已經該大臣及西凌阿等分路追截復諭令僧格林沁派多爾濟那木凱達洪阿帶領馬步隊兵三千餘名前往助剿再加以東三盟勁旅三千諒此敗竄餘匪不難剋期殄滅現在安徽巢廬一帶賊匪意圖北竄昨據江忠源奏江西賊船自九江竄擾興國官

軍失利河南山東與皖楚毗連爲畿輔屏障關繫天下大局著勝保悉心統籌務將此股鼠匪趕緊殄滅其零星餘匪或酌留西凌阿善祿一人帶兵與德勒克色楞搜捕勝保卽可選帶精銳官兵向南迎擊軍威定可大振勝保竭盡忠勇心力俱瘁朕甚廕於懷德勒克色楞抵營後伊所帶之蒙古兵俱係未經戰陣必應隨同一兩仗方可獨用諒勝保亦深悉朕之

倚畀也惟軍情變幻靡常難以懸揣仍著該大臣悉心籌辦

上諭內閣曰著派土默特貝子德勒克色楞額統帶東三盟官兵馳赴勝保軍營幫辦軍務

同日

上命軍機大臣傳諭陸應穀崇恩曰昨據勝保奏深州賊匪於二十日夜閒全股由東南逃竄勝保等已派

兵跟蹤追擊復分兵截勦恐賊匪窮蹙竄及河南山東境界現在陸應穀已馳赴河北崇恩扼守德州一帶著卽督飭弁兵及地方文武於交界處所嚴密堵禦如有賊匪竄入卽與勝保等大兵合力夾擊毋稍疏虞前由江西下竄匪船現在安徽安慶巢廬一帶滋擾昨復據江忠源奏賊匪由九江竄擾湖北興國田鎮失守河南山東與皖豫壤地毗連尤宜防賊北

竊因思豫東現辦團練尙屬認真著陸應穀卽飭令徐廣綰會同總兵柏山及各地地方官督率弁兵與各屬辦理團練紳民併力嚴防瑞昌現駐山東濮州與鎮道等聲勢聯絡仍須各屬團練協助兵力聞劉韻珂毛鴻賓等均能熟悉本處地方情形著崇恩傳諭各員並所屬官紳一體扼要防堵毋令南來匪徒乘間闖入已革總兵三星保著留於山東差遣委用此

時徵調遠兵勢難濟急惟有官民合力保衛地方衆志成城必有實效其黃河各處渡口船隻仍當認真收集並隨時知照王履謙長臻楊以增實力巡查萬不可令賊匪偷渡

二十四日丙寅僧格林沁奏言逆匪現竄獻縣地

方雖在深州迤東偏北切近河間惟據探報河間迤北新城以南雄縣鄭州以東至天津及任

邱大城靜海一帶現因積水成河不通旱道逆
匪似難北犯此時若卽令多爾濟那木凱達洪
阿往任邱趙北口一帶截擊該處四面皆水萬
一賊由東西橫竄兵爲水阻繞越不及必致遲
滯是以臣飛飭多爾濟那木凱達洪阿卽日由
北河移營新城地方暫紮正當適中足資扼截
並札令恩華管帶左翼前鋒護軍營官兵一千

名侍衛綑關選帶察哈爾官兵七百名移紮固
安並遵將培成所帶官兵一千二百五十名撤
回俟到營時亦卽令其駐紮固安互爲應援以
壯聲勢惟河間至保定現無泥淖阻隔仍恐該
逆向西北奔繞則涿州仍係要衝是以臣仍在
涿州駐紮儻逆匪由獻縣東竄青縣靜海一帶
則武清縣務關路等處喫緊彼時再令前路多

爾濟那木凱等移營進紮武清務關扼截臣卽
可移營固安橫前截剿奏入

上命軍機大臣傳諭僧格林沁曰多爾濟那木凱達洪
阿所帶官兵暫紮新城仍距勝保軍營尙遠不能合
力夾擊直省南路之兵現在催調旣未齊來若北路
無兵協濟恐賊匪沿途裹脅日多剿辦更難得手著
該大臣仍遵前旨迅飭多爾濟那木凱達洪阿帶領

馬步各隊探賊所向趕緊馳往迎擊與勝保合力夾攻斷勿株守直隸賊匪一日不滅天下大局一日不定其餘派撥一切布置尙屬周妥仍著隨時確探賊蹤相機調度此股賊匪必須及早殲除遠堵不如近剿諒該大臣亦當通盤籌及也

上又命軍機大臣傳諭勝保曰昨派德勒克色楞幫辦軍務統帶東三盟官兵馳赴勝保軍營此項官兵到

營尙需時日而攻勦刻不容緩多爾濟那木凱達洪
阿所帶之兵應於何處迎頭截擊著勝保就近調撥
務將竄匪剋期殄滅至東三盟官兵陸續趕到時並
著勝保隨時知照扼要兜勦勝保自深州接仗後尙
無續報未識賊情若何該大臣等何日追及諒必得
有勝仗卽日迅掃賊氛也

同日勝保奏言臣揆賊意本欲北擾現因大兵

漸集屢受懲創賊膽已寒況天津四圍皆水防
衛又嚴恐其卽由交河一帶南竄山東已飛咨
慧成崇恩作速扼要嚴防迎頭堵剿以便前後
夾擊臣愚見將賊驅出直境再行極力追殺方
爲穩便然徐州一帶緊要非常仍請

飭下慧成崇恩等作速帶兵迎擊總不令其再行渡黃
爲要或於通河及大路要隘密設伏兵以便追

勦得力再現在帶兵將領雖多欲求忠誠奮勇
不待催促卽肯向前者實難其人查達洪阿人
頗忠勇如果賊匪南竄則北路可以無虞仰懇
天恩飭令該總兵酌帶官兵隨同前往追勦俾可收一
臂之助奏入

上諭曰西凌阿頗知奮勉又係幫辦使伊扼其前路或
能得力總不若急催多爾濟那木凱達洪阿合兵進

勦必可得力爲萬全上策多爾濟那木凱人甚長厚
不及達洪阿之望重力猛也此股逆匪斷不能任其
回渡黃河來去自由況江南大股未必不死心北竄
務須斬盡殺絕庶楊逆一時不敢孟浪北擾第疆吏
將士如汝之忠勇向前者不可多得朕任汝之重汝
必知之天下蒼生所關甚大汝尤須倍存鄭重探報
未確不可輕進也

勝保又奏言臣於二十二日馳抵河間探明逆
匪竄至獻縣查該縣距河間僅七十里臣已派
維祿魁福帶領馬隊連夜先赴獻縣北十二里
之臧家橋地方扼截臣隨後督兵繼之並飛咨
西凌阿善祿如賊仍在獻縣卽分扼東南西北
兩路不使竄出臣飛速由北擣下以期痛加剿
除僞賊又向東南竄逸卽督催馬隊衝殺步隊

隨後追趕不容逆匪喘息臣卽日探明賊蹤所向相機扼截不使竄過河間天津總以捍衛北犯爲第一要務後路官兵業已催赴景州一帶爲南路聲援現經續撥官兵三千名想日內卽可來營添此勁旅勦辦自易得手其慶祺所帶官兵臣已令探明賊蹤相機進止或作大兵後路應援或駐趙北口以防由大城一帶北竄奏

八

上命軍機大臣傳諭勝保曰賊匪意圖北竄知大兵扼其前路勢必紛竄東南此時自以防其北犯爲要惟南竄山東該處兵力尙單恐難抵禦且恐安徽賊匪聲息相通又滋勾結總應在直隸境內殲除淨盡俾免後患茲復諭知僧格林沁迅催多爾濟那木凱達洪阿飛速帶兵前進與該大臣合力攻剿其應由何

路前進之處著勝保酌量調撥至天津一帶亦爲賊所覬覦必須截其要路勿令乘虛東竄懋成現在揚州已疊諭崇恩嚴密防範該署撫現任德州一帶著卽隨時知照互爲聲援

上又命軍機大臣傳諭僧格林沁曰賊匪竄至獻縣勝保由河間向南迎擊必須厚集兵力方能痛加剿洗著該大臣速卽催令多爾濟那木凱達洪阿卽日帶

兵馳往河間一帶與勝保合爲一軍併力圍攻此股匪徒必須趁此喘息未定悉數殲除萬不可稍有遷延今早廷寄朕意猶在持重恐官兵落後是時移步換形萬不可拘泥前旨總以越快越好該大臣仍與勝保隨時知照確探賊情相機布置如賊竟往東竄自應酌量移兵防堵

上又命軍機大臣傳諭崇恩曰賊由深州東竄獻縣勝

保帶兵由河間向南進剿該逆被剿窮蹙難保不紛
竄東南山東與直隸交界地方著崇恩嚴飭文武員
弁督率兵勇實力嚴防與勝保合力夾擊瑞昌現駐
濮州能否移緩就急仍須酌量情形相機布置至江
南接壤地方亦宜嚴加防範不可令南來匪徒乘間
偷渡黃河其運河及南北要路尤應密設伏兵以便
追剿得力該署撫務當統籌東省全局激勵兵勇保

衛地方並隨時知照勝保務使聲勢聯絡以壯兵威

同日

上命軍機大臣傳諭英桂曰前由江西下竄賊船半在
安慶巢廬一帶滋擾半由九江竄入湖北興國州一
帶河南與皖楚毗連不可不嚴加防範英桂接奉此
旨自以嚴防楚皖賊匪爲要迅卽起程萬勿稍有遲
延並著察看情形何處喫緊卽馳往駐紮督同總兵

卷之二
柏山及地方文武員弁與團練紳民一體扼要防堵
黃河各處口隘務將渡船設法收集並隨時知照王
履謙長臻實力巡查毋任賊匪偷渡其河北懷衛一
帶卽傳諭余炳燾會同該鎮道等加意嚴防

上諭內閣曰前因歸德失守將河南巡撫陸應穀革職
留任乃逆匪渡河北竄由山西復入河南武安涉縣
擾及直隸地方陸應穀不能先事豫防咎實難辭著

革職卽行來京交巡防王大臣差委